



## **Messadi per la radunanza communal digls 24 da zarcladour 2015**

Stimadas votantas, stimos votants

Suandontamaintg az infurmainsa davart dallas tractandas tgi vignan discutadas e deliberadas a caschung dalla radunanza communal digls 24 da zarcladour 2015.

### **Protocol dalla radunanza communal digls 7 d'avregl 2015**

Digl protocol ò savia neir piglia invista u tg'el ò savia neir retratg digls 24 d'avregl 2015 anfignen igls 23 da matg 2015, durant 30 deis an canzleia communal. Ainfer igl termin d'exposiziun èn inoltradas nignas protestas. Igl protocol vign damai declero per approvo e vign sotsignia digl mastral e digl protocollist.

### **Mantignamaint da veias Casti „Veia Cumpogna“**

Igl cumegn Albula/Alvra ò l'intenziun da renovar la Veia Cumpogna, tranter la veia cantunala viglia a „Sontg Ambriesch“ anfignen igl stabilimaint da scola a Cumpogna ed igl parcadi tar la scola a Cumpogna. An consequenza d'influenzas da schalada demossa la surfatscha dalla veia gronds donns. La dismessa dall'ava dalla veia mantga per part. La capaciad da tgargia scu er la siertad da schalada dalla surfatscha èn insuffiziantas. An madem mument ègl d'eriger en passape da ca. 27 m lunghezza scu schurmetg digls pedunzs, surtot digls scholars, per lung digl parcadi tranter la staziun da trafo e la tgesa da scola. Igl costs approximativs montan a 898'000.00 fr. Perveia dalla gravezza da splaer igl traffic durant la construcziun, ègl previa da realisar las lavours an etappas. Durant las fegns d'emda e durant igl travagl da scola vign tschartgea da pussibilitar en passagi tant scu pussebel sainza impedimaints.

### **Mantignamaint da veias a Stierva „veia tras vischnanca“**

Ainten la fracziun da Stierva è nia scumanzo avant 10 onns cun la sanaziun an etappas dalla veia da vischnanca e cun la reit da conducts d'ovra. Divers tschancungs èn sanos dantant ed igls indrezs correspondents d'avas persas èn realisos cugl sistem da separaziun. Igl tschancungs pendants tgi on anc da neir sanos vignan repartias an treis etappas. Tar l'etappa 1 sa tractigl dalla veia da cantun ainten vischnanca da Stierva. Da chella etappa surpeglia igl cantun igls costs totals dalla sanaziun (507'260.00 fr.), uscheia tg'igl cumegn ò angal da surpiglier igls costs dalla renovaziun digls agens conducts d'ovra. Chels montan a 242'940.00 fr. Las etappas 2 e 3 cumpeglian igls tschancungs da colliaziun tranter las parts gio sanadas e la veia cantunala.

Igl è previa da realisar l'etappa 1 igl 2015/2016 e las etappas 2 e 3 igls onns suandonts. Igls costs totals per tottas treis etappas montan a 1'762'800.00 fr. (incl. taglia sen plevaleta), digls quals igl cantun surpeglia 507'260.00 fr. e 65'100.00 fr. vignan surpiglias da terzs (subvenziuns, contribuziuns privatas). Igls costs restants effectivs per igl cumegn Albula/Alvra montan a 1'190'440.00 fr.

### **Statuts consorzi da scola Val Alvra dafora**

Cun la midada digl territori politic an Val Alvra dafora è ena revisiun digls statuts digl consorzi da scola Val Alvra dafora davantada inevitabla. Da nov furman angal ple dus cumegns politics igl consorzi da scola. Igls statuts revidias risguardan supplementarmaintg las cundiziuns da rom dalla nova lescha da scola digl cantun Grischun.

Igls statuts novs ramplazzan igls statuts digls 01-01-2011.

### **Statuts consorzi da scola superioura Val Alvra**

A fundamaint dalla fusiun digls cumegns Albula/Alvra, davainta er la revisiun digls statuts digl consorzi da scola superioura Val Alvra necessaria. Igls cumegns Albula/Alvra, Bergün/Bravuogn, Filisour, Lantsch/Lenz e Farrera furman da nov igl consorzi da scola. Igls organs digl consorzi da scola èn: igls cumegns digl consorzi, igl cunsegl da scola e la cumischung da gestiun. Aint igl rom dalla revisiun digls statuts èn nias reglos da nov tranter oter igls pensums, las cumpetenzas scu er la finanziaziun. Igls statuts novs von an vigour cun l'acceptaziun dalla radunanza communal e cun l'approvaziun dalla regenza, sen igl 1. d'avost 2015.

Igls 2 da zarcladour 2015

La suprastanza digl  
cumegn Albula/Alvra